

दिनांक 21.06.2024

समय: 18.45 बजे

## आकाशवाणी जयपुर-अजमेर

### प्रादेशिक समाचार

- अन्तर्राष्ट्रीय योग दिवस रे मौके आज देशभर मांय योग अभ्यास रा कार्यक्रम राख्थी ज्या- प्रधानमंत्री री अगुवाई मांय श्रीनगर मांय राष्ट्रीय स्तर रो आयोजन-राज्य स्तर रा कार्यक्रम मांय राज्यपाल लोगां ने योग रो संकल्प दिरायो।
- मुख्यमंत्री भजन लाल शर्मा कह्यो -आवता बगत मांय राज्य सरकार हर महीना भर्तियां निकाळेला।
- केन्द्र सरकार महिलावां ने मजबूत बणावण सारू खास संपर्क जागरूकता अभियान चलायो।

अर

- प्रदेश मांय आज ई केई ठौड़ां तेज अंधड़ सागे बारिश व्ही-आवता सप्ताह मांय बिरखा-छांटा री हलचल और बधबा रा आसार।

0000

अंतर्राष्ट्रीय योग दिवस आज पूरी दुनिया मांय योग अभ्यास रा कार्यक्रमं सागे मणायी ज्यो। राष्ट्रीय स्तर माथे खास कार्यक्रम प्रधानमंत्री नरेन्द्र मोदी री अगुवाई मांय जम्मू-कश्मीर रा श्रीनगर मांय शेर-ए-कश्मीर अंतर्राष्ट्रीय सम्मेलन केंद्र मांय राख्थी ज्यो। ई मौके प्रधानमंत्री शरीर रा, दिमाग रा अर आध्यात्मिक विकास मांय योग ने घणो खास बतायो। वे कह्यो के दुनियाभर मांय योग अपनावण वाळां री तादाद बधती जा रही है अर इण री उपयोगिता ने लोग पिछाण रह्या है। प्रदेश मांय राज्य स्तर रो कार्यक्रम जयपुर रा सवाईमानसिंह स्टेडियम मांय राख्थी ज्यो। कार्यक्रम मांय राज्यपाल कलराज मिश्र जनता ने "योग स्वयं के लिए और समाज के लिए" रो संकल्प दिरायो। वे सगळां रे सुखी अर निरोगा व्हेवण अर देश अर समाज समाज सारू मिल र काम करण री अपील कीनी। कार्यक्रम मांय मुख्यमंत्री भजन लाल शर्मा, उपमुख्यमंत्री डॉ. प्रेमचन्द बैरवा, विधानसभा अध्यक्ष वासुदेव देवनानी, मुख्य सचिव सुधांशु पंत अर दूजा मान्योड़ा लोग ई एके सागे योग अर प्राणायाम रो अभ्यास कीनो। कार्यक्रम पाछे मुख्यमंत्री खबरनवीसां सागे बातचीत करता थकां कह्यो के योग म्हाणी संस्कृति है अर ओ सम्पूर्ण स्वास्थ्य रो मंत्र है। आयुष मंत्रालय अर राष्ट्रीय आयुर्वेद संस्थान, जयपुर री ओर ऊं शहर रा जंतर मंतर माथे नौजवानां सारू योग अभ्यास कार्यक्रम राख्थी ज्यो। विधानसभा भवन परिसर, राजस्थान स्वास्थ्य विज्ञान विश्वविद्यालय-आरयूएचएस अर भगत सिंह पार्क समेत शहर मांय न्यारी-न्यारी ठौड़ां योग अभ्यास ऊं जुड़्या कार्यक्रम राख्थी ज्या। राज्य रा न्यारा-न्यारा जिलां मांय ई योग दिवस रे मौके जिला, ब्लॉक अर ग्राम पंचायत लेवल माथे कार्यक्रम राख्थी ज्या। सरहदी जिला जैसलमेर मांय बीएसएफ रा जवान करीब एक घंटा ताई योग अर दूजी क्रियावां कीनी। राजस्थान फ्रंटियर मुख्यालय सीमा सुरक्षा बल जोधपुर अर इण रा अधीन सगळा सेक्टर/बटालियन मुख्यालयां अर सीमा चौकियां माथे ई सीमा रा पहरेदार योगाभ्यास कीना। सिरोही जिला रा आबूरोड़ मांय ब्रह्मकुमारी आश्रम मांय एके सागे 10 हजार लोग योग अभ्यास कर र फिट रेहवण रो संदेश दीनो। भरतपुर रा जवाहर बुर्ज माथे राख्थी ज्या कार्यक्रम मांय लोग बुर्ज री न्यारी-न्यारी ठौड़ां ऊबा व्हे र सूर्य नमस्कार समेत न्यारा-न्यारा योगासन

कीना। अजमेर रा पुलिस लाइन मैदान मांय राख्थी ज्या कार्यक्रम मांय एथलीट अर्जुन प्रमाण न्यारी—न्यारी योग मुद्रावां रो दरसाव कीनो।

बीकानेर मांय राख्थी ज्या योग कार्यक्रम मांय केंद्रीय मंत्री अर्जुन राम मेघवाल ई सिरकत कीनी। कोटा रेल मंडल मांय न्यारा—न्यारा टेसनां माथे योगाभ्यास रा कार्यक्रम राख्थी ज्या। खास टेसनां माथे योग ऊं जुड़्या वीडियो, योग उद्घोषणा अर जिंगल्स चला र मुसाफिरां अर कर्मचारियां ने योग करण सारू प्रेरित करी ज्या। सर्वाईमाधोपुर रा पीएम श्री केन्द्रीय विद्यालय मांय ई न्यारा—न्यारा योग आसनां रो अभ्यास करी ज्यो। राजसमंद मांय विश्व धरोहर कुंभलगढ किला परिसर मांय राख्थी ज्या योगाभ्यास कार्यक्रम मांय लोग उमाव सागे सिरकत कीनी।

000

राष्ट्रपति द्रौपदी मुर्मू जनता ने अंतर्राष्ट्रीय योग दिवस रे मौके शुभकामनावां दीनी है। सोशल मीडिया पोस्ट रे ज़रिये राष्ट्रपति कह्यो के जीवन रा तरीका ऊं जुड़ी समस्यावां मांय बधोतरी ने ध्यान राखता थकां योग और खास बण ग्यो है। राष्ट्रपति मुर्मू जनता ऊं योग ने जिन्दगी रो हिस्सो बणावण री अपील कीनी।

000

राज्य मांय आवता बगत मांय सरकार हर महीना भर्तियां निकाळेला। मुख्यमंत्री भजनलाल शर्मा आज जयपुर मांय अखिल भारतीय राष्ट्रीय शैक्षिक महासंघ रा 62वां प्रांतीय अधिवेशन मांय आ जाणकारी दीनी। मुख्यमंत्री कह्यो के राज्य सरकार कर्मचारियां रा भला माथे खास ध्यान दे रही है अर वां रा भला सारू सरकार एके पाछे एक सकारात्मक कदम उठा रही है। वे कह्यो के कॉलेज अर विश्वविद्यालय रा शिक्षकां री सेवानिवृत्ति री उम्र रा बारा मांय उचित कदम उठाया जावेला। वे कह्यो के कॉलेज अर विश्वविद्यालयां मांय रीता ओहदा बेगा ई भर्या जावेला। मुख्यमंत्री कह्यो के आवता बगत मांय भांत—भांत री भर्तियां निकाळी जावेला।

-----

0000

राज्यपाल अर विश्वविद्यालयां रा कुलाधिपति कलराज मिश्र विश्वविद्यालयां ऊं बेहतरीन ज्ञान रा केन्द्र बणवा सारू कह्यो है। वे विश्वविद्यालयां ऊं जीवन व्यवहार री सिख देवण वाळां शिक्षा केन्द्र बणवा सारू कह्यो। राज्यपाल आज जोधपुर मांय जयनारायण व्यास विश्वविद्यालय रा दीक्षांत समारोह मांय बोल रह्या हा।

वे कह्यो के राष्ट्रीय शिक्षा नीति 2020 मांय किताबी ज्ञान सागे आला दर्जा री भणाई मांय व्यावहारिक कोर्स माथे जोर दियो ज्यो है। वे कह्यो के जयनारायण व्यास विश्वविद्यालय ने प्रधानमंत्री उच्चतर शिक्षा अभियान रा तैत 100 करोड़ रूप्या री रकम केन्द्र अर राज्य सरकार कानी ऊं मंजूर करी ज्यो है। जळसा मांय राज्यपाल न्यारा—न्यारा इन्तिहान मांय अबल रह्या विद्यार्थियां ने सोना रा तमगा दे र नवाजा।

000

केंद्रीय कानून मंत्री अर्जुन राम मेघवाल कह्यो के देश मांय नेशनल लिटिगेशन पॉलिसी लागू करी जा रही है। नुवी सरकार मांय कानून मंत्री बण्या पाछे पहली दफा बीकानेर पधार्या मेघवाल आज खबरनवीसां सागे बातचीत करता थकां कह्यो के 1 जुलाई ऊं लागू कर्या जा रह्या तीन नुवा कानून देश री न्याय व्यवस्था ने और मजबूत बणावेला।

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारू श्रृंखला चलायी जा रही है। आज पेश है भारतीय नागरिक सुरक्षा संहिता रा खास प्रावधान री जाणकारी— फरियादी ने वां री शिकायत रा बारा मांय पूरी जाणकारी मुहैया करावण सारू धारा 173 (2) रा तैत पुलिस कानी ऊ दर्ज एफ.आई.आर. री मुप्त प्रति हासिल करण रो हक दियो ज्यो है। कानून

री धारा 193 (3) रा भाग 2 रा तहत पुलिस सारू अब जांच रा 90 दिन मांय फरियादी ने जांच री प्रगति रा बारा मांय जाणकारी देवण जरूरी कर दियो ज्यो है। धारा 230 रा तैत फरियादी ने इलेक्ट्रॉनिक तरीका ऊं कागजात मुहैया करावण रो प्रावधान करी ज्यो है। ई रे अलावा धारा 265 रा तहत फरियादी ने इलेक्ट्रॉनिक तरीका ऊं सबूत पेश करण रो सुबीतो ई दियो ज्यो है।

000

केन्द्र सरकार महिलावां ने मजबूत बणावण सारू एक सौ दिन रो खास संपर्क जागरूकता अभियान चलायो है। नई दिल्ली मांय अभियान री सरूआत करता थकां महिला अर बाल विकास राज्य मंत्री सावित्री ठाकुर कह्यो के सरकारी योजनावां री जाणकारी री कमी रे कारण महिलावां अक्सर आं रो फयादो नी ले सके है। वे कह्यो के ओ खास संपर्क अभियान ब्लॉक लेवल माथे आशा अर आंगनबाड़ी कार्यकर्तावां ने सिखावण देवण सारू डिज़ाइन करी ज्यो है। खबरनवीसा सागे बातचीत करता थकां महिला अर बाल विकास राज्य मंत्री कह्यो के हर हलका मांय आठ सदस्यां री टीम बणायी जावेला जो जागरूकता अभियान लागू करण सारू केन्द्र सागे तालमेल बिठावेला।

000

प्रदेश मांय आज ई केई ठौड़ां तेज़ अंधड़ सागे हल्की बारिश व्ही जद के केई ठौड़ां बादळा मण्ड्या रह्या। जयपुर, अजमेर, दौसा, नगौर, चित्तौड़गढ, राजसमंद, सर्वाईमाधोपुर, करौली, धौलपुर अर टोंक जिलां मांय कठे-कठे जोरदार बायरो बाजण सागे बिरखा व्ही तो कठे-कठे छांटो-छिड़को व्ह्यो। मौसम विभाग रे मुजब आज बीकानेर, जयपुर भरतपुर, कोटा अर उदयपुर संभाग मांय कठे-कठे बादळां री गाज़ सागे मेह व्हेवण रा आसार है। आज कोटा अर उदयपुर संभाग मांय कठे-कठे मझला ऊं तेज दर्जा री बिरखा व्हेवण अर कठे-कठे जोरदार बिरखा व्हेवण रा आसार है। मौसम केंद्र जयपुर रा निदेशक राधेश्याम शर्मा बतायो के आवता एक सप्ताह मांय बिरखा-छांटा ऊं जुड़ी हलचल मांय बधोतरी रा आसार है।

-----

000

झालावाड़ जिला रा जल दुर्ग गागरौन रे यूनेस्को कानी ऊं विश्व धरोहर व्हेवण रो ऐलाण करण री वर्षगांठ रे मौके संगोष्ठी राख्यी ज्यी। साल 2013 मांय झालावाड़ रा ई किला ने विश्व धरोहर री फेहरिश्त मांय शामिल करी ज्यो हो। आहू अर कालीसिंध नदियां रा संगम माथे अरावली पर्वत री सहयोगी मुकुन्दरा हिल्स माथे खींची राजावां कानी ऊं बिना नीव बणायी ज्यो ओ किलो कोटा रियासत रो खास किलो हो।

000